

Zabawa

No, toż momy karnawał. Troszka ci łon bydzie krotszy jak łońskiego roku, nale i tak aże do „Dnia Kobyt” zetrwo. A jo, kiej żech już tak cołkiym wytrzyźwił po tych Godach, Nowym Roku i gybustaku mojj Elzy, dostolech ci szlak aże mie zamgloło. Patrza ci sie tak na łodwiczczu we telewizor i mało żech ze szeszłonga niy ślecioł. Gawca sie a w tyj telewizyji pokazujom ci take dupne auto z Mikołojym i fonclami, połne Coca-Coli, a za tym ci idzie śpiywka:

„Coraz bliżej święta, coraz bliżej święta...”

Ludzie, przeca te Amerikony to już nos richtik majom za łostatnich gupielokow. Widzioł to fto śpiywać we Trzech Kroli, iże corozki bliżyj świynta ?

Nale, jes karnawał i woł niy woł wybrolech sie ze mojuom starom na taki bigel.

Idymy sie tak bez Wolka i wele tyj chałupy przy poćcie łobstrojonyj i łobświytlonyj choby burdel w jakimsik Hamburgu, trefyli my Gustlika łod Kurpyncynj.

Naprawy niyborok jak bela kulwito ci sie łon łod ściany do glajzow i nazod.

– *Gustel, co jes? Po jakiymu żeś sie tak naproł jak niyboskie stworzynie – zagodolech jak sztopnoł boł wele mie. Łon ci sie tak wejrzoł tymi kaprawymi ślypiami na mie i na Elza i pado:*

– *Ano, miolech iść ze mojuom starom na zabawa. Kiej my już mieli wylazować z chałpy łoroz maja staro chyto mie za knefel z westy i robi mi egzorta. Mosz Gustel niy kurzić cygaretow, mosz niy pić gorzoły z kamratoma i mosz niy tańcować ze cudzymi babami. Ty sie mosz ino gynal dobrze bawić ! Rozumisz ?*

Ojgyn, kiej jo to uslyszoł to nic ino żech prasknoł dźwyrzami i poszolech sie som do szynku. Beztoż żech sie tak ścioproł jak świnia i pyndaluja do inkszego szynku.

Sami widzicie, iże chop niy mog inacyj, ba jak sie idzie bawić bez gorzoły i cudzych babow ? Już przeca za starygo piyrwyj sie godało (i śpiywało), iże łod nowygo roku:

„ Kożdy chocia roz wypije, bo ci to na zdrowie.

A przestaniez być markotny, kiej zaszumi w gowie”.

Moja Hażbiytka to już tyż zno i beztoż my sie na zabawie widzimy ino przy piyrszym koncku i dziepiyro rano kiej mie musi zawlyc do dom. I jo to wiym, iże to jes zabawa a niy roraty w Jozefce. A na łostatek to musza pedzieć, iże terozki zabawa to niy to co downij. Muzyka dudni choby we Africe, światła blyskajom jak na łodpustowym karasolu a gorzoła gibcij do rzici wlazuje i wali w dekel jak bimber pyndzony we stanie wojynnym.

No to pyrsk.

Ojgyn z Pniokow.